

四庫全書

集部

欽定四庫全書

遺山集卷十

金 元好問 撰

七言律詩

追錄洛中舊作

樂府新聲綠綺裘
梁州舊曲錦纏頭
酒兵易壓愁城破
花影長隨日脚流
萬里青雲休自負
一莖白髮儘堪羞
人間只怨天公了
未便天公得自由

東園晚眺

東平

霜鬢蕭蕭試鑷看怪來歌酒百無歡舊家人物今誰在
清鏡功名歲又殘楊柳挽春出新意小梅留雪弄餘寒
一詩不盡登臨興落日東園獨倚欄

十一月五日暫往西張

城隈細路入沙汀絮帽衝風日再經歟歲村虛更荒惡
窮冬人影亦伶俜林煙漠漠鴉邊暗山骨稜稜雪外青
四十年來此寒苦凍吟猶記隴關亭

石嶺關書所見

軋軋旃車轉石槽故關猶復戍弓刀連營突騎紅塵暗
微服行人細路高已化沙蟲休自歎厭逢豹虎欲安逃
青雲玉立三千丈元只東山意氣豪

陀羅峯二首

念念靈峯四十年一來真欲斷凡緣鑿開混沌露元氣
散布兜羅彌梵天雲卧無時不間在樓居何處得超然
殊祥莫詫清涼傳會與茲山續後篇

每恨奇探負盛年松崖今喜入攀緣初驚靈鷲多飛石

更信金牛有漏天鄉國登臨乃如此名場馳逐亦徒然
留詩便與香泉約起本西游第一篇

僧行平陽
僧慧太原

追懷曹徵君

生死論交不易忘一回言別淚千行空勞結伴歸蓮社
無復題詩寄草堂楚國先賢宜有傳粵阡羈鬼謾思鄉
因君錯怨天公了且道今誰晚節昌

春日書懷呈劉濟川

鄉社荒殘住不成無端蓬華掩柴荆流年又見東風菜

樂土空懷北斗城父老只供留我醉兒童也喜從君行

周侯見說應相笑共隱三泉先有盟

東風菜見
本草菜部

晉溪

石磴雲松着色屏岸花汀草展江亭青瑤壘梵通懸甃
白玉雙龍掣迅霆地脉何嘗間今昔尾閭真解泄滄溟
乾坤一雨兵塵了好就川妃問乞靈

弔岳家千里駒

蜀客淒涼土一丘後生還有化身愁靈椿丹桂偶相值

蕙草清霜寧久留掌中玉雪恩憐在筆底雲煙取次休
過眼空華只如此不如無子却無憂

七月十二日行狼牙嶺

狼牙路滑馬伶俜老鶴超超欲上征一曲松風寫幽致
九秋雲物愴離情天開員嶠方壺境澗落銀河月窟聲
覲面青山入渠手定誰胸次玉崢嶸

十三日度岳嶺

神岳規模亦壯哉上階絕境重裊回丹青萬木秋風老

金翠千峯落照開
川路漸分猶暗澹
湍聲已遠更淒哀
石門剩比靈丘遠
正坐登臨欠一來

玉泉二首

神岳提封入寺基
上公官秩見僧碑
雲藏佛屋晴猶暗
樹近禪窓老更奇
竹杖只供行險易
藜床偏與望川宜
同時不及髯中令
猶得泉名比鳳池

玉水泓澄古殿隅
又新名第不關渠
每因天日流金際
更憶風雷裂石初
百里官壺分韻勝
千人齋粥薦甘餘

八功德具休誇好玩景臺荒有破除

玉泉寺東北有玩景臺盡得神川之

勝導者悞引之荒
山一尖故有二句

玄都觀桃花

前度劉郎復阮郎玄都觀裏醉紅芳
非關小雨能留客自是桃花要洗粧
人世難逢開口笑老夫聊發少年狂
一盃盡吸東風了明日新詩滿晉陽

贈張致遠

茅屋瀟瀟潁水濱
兩山相望即比隣
禪房道院留連夜

酒榼詩囊浩蕩春老鶴千年見城郭徵君晚節傍風塵
相逢不盡平生意耆舊風流有幾人

夜宿秋香亭有懷本菴英上人

兄弟論交四十年相從旬日却無緣去程冰雪詩仍在
晚節風塵私自憐蓮社舊容元亮酒藤溪多負子猷舡
茅齋一夕愁多少窓竹瀟瀟耿不眠

汴梁除夜

追錄

六街歌鼓待晨鐘四壁寒齋只病翁鬢雪得年應更白

燈花何喜也能紅養生有論人空老祖道無詩鬼亦窮
數日西園看車馬一番桃李又春風

上聲

與馮呂飲秋香亭

三子皆吾友之純席生

龐眉書客感秋蓬更在京塵瀕洞中莫對青山談世事

且將遠目送歸鴻龍江文采今誰似

謂之純

鳳翼

永寧地名

年

光夢已空剩着新詩記今夕尊前四客一衰翁

哀武子告

生氣曾思作九原迷途爭得背南轅梁鴻故事要離墓

衛國孤兒祇樹園

子今為僧

舊說布衣甘絕脰今傳史筆記

歸元知君祿仕無心在旌孝終當到李源

贈李春卿

竇十郎家指顧間因君我亦愛西山丹房藥鏡平生了
禪榻茶煙歲月間春甕有情供白墮秋風無力損紅顏
重來已有明年約剩破都城幾往還

甲辰秋留別丹陽

踈踈衰柳映金溝祖道都門復此留千里關河動歸興

九秋雲物發詩愁嚴城鐘鼓月清曉老馬風沙人白頭
後夜相思渺何許山西畔是并州

龍興寺閣

全趙堂堂入望寬九層飛觀儘高寒空聞赤幟疑軍壘
真見金人泣露盤桑海幾經塵劫壞江山獨恨酒腸乾
詩家總道登臨好試就遺臺老樹看

別緯文兄

玉壘浮雲變古今燕城名酒足浮沉眼中誰復承平舊

言外驚聞正始音異縣他鄉千里夢連枝同氣百年心
行期幾日休相問觸撥羈愁恐不禁

甯椽端甫北上

馬頭風雪遠相迎
沓弓刀四十程
自是青雲動高興
未甘白髮老諸生
書來沙漠燈花喜
夢到秦川煙樹平
長句送君還自媿
半山已有鴈飛行

荅定齋李兄

小山藜桂姓名香
舉世何人得鴈行
滄海揚塵幾今昔

長庚配月獨淒涼
虛勞裴相求白傅
正倚源明識漫郎
十載相從未言晚
城南泉石有雲庄

空山何巨川虛白菴二首

舊向韋編悟拈囊
肯隨文本被青黃
吉祥止處無餘物
知見薰來有底香
空谷自能生地籟
浮雲爭得翳天光

只愁八月風濤壯
夢裏江聲撼客床

何臨安人

露菊霜茱薦枕囊
石泉崖蜜破松黃
只緣山遠無來客
更覺心清聞妙香
碁局儘堪消日晷
吟毫真合染溪光

劇談不盡江湖景重與青燈約對床

聽姨女喬夫人鼓風入松

白雪朱絃一再行春風纖指十三星雲窓霧閣有今夕
寶靨羅裙無此聲瀟灑寒松度虛籟悠颺飛絮擾青冥
胎僊不比湘靈瑟五字錢郎莫漫驚

哭樊帥

自倚沉寃有舌存爭教無路叩天閭裝囊已竭千金賜
絕幕誰招萬里魂東道漫悲梁苑客南園多負壽張孫

金瓶梅詞話卷十
春風花落歌聲在夢裏能來共酒尊

寒食

壬子清
明後作

上苑春風盛物華天津雲錦赤城霞
輕舟矮馬追隨遠翠幙青旗笑語譁
化國樓臺隔銀海吳兒洲渚記仙家
山齋此日腸堪斷寂寞銅餅對杏花

送樊順之

弓刀十驛岳蓮州渭水秦山得意秋
王粲從軍正年少庾郎入幕更風流
寒鄉况味真鷄肋清鏡功名屬虎頭

寄謝溪風亭上月老夫乘興欲西游

蜀昭烈廟

合散扶傷老益堅荒祠重過為淒然君臣洒落知無恨
庸蜀崎嶇亦可憐一縣山陽堯故事三年章武魏長編
錦官羽葆今何處半夜樓桑叫杜鵑

宿翠屏口

鬚鬚蒼白葛衣寬事外閑身也屬官授簡如聞數枚叔
乘車初不少馮驩沙城雨塌名空在石峽風來夏亦寒

兩飽三飢已旬日虛勞兒女勸加餐

王敦夫祥止菴

三樂人推二樂全有親可事子能傳舊時詩禮聞家學
此日丹砂見地仙蕩蕩天光虛室外融融和氣彩衣前
情知不羨燕山桂一樹靈椿歲八千

過寂通庵別陳丈

甲辰秋

陳丈未識某而愛其詩曾對高御史士美言我
他日見遺山當快飲百醉後見之而公已病乃

相約易百醉為百杯每見以酒籌計之至七八
十杯復有此別故詩中及之

心遠由來地自偏不離城市得林泉從教上界多官府
且放閒身作地仙三月有期何敢負百杯未滿會須填
違離更覺從公晚却望都門一慨然

梁移忠詩卷

一箭功成塞上歸迺翁垂白藉扶持燕雲義俠風流遠
里社陰功父老知龍種作駒元自異虎頭食肉未應遲

高門更與增華表
丁令還家先有期
時都運丈已下世故詩中及之

喬千戶挽詩

高塚驚看石表新
空將事業望麒麟
燕遼部曲千夫長

楚漢風雲百戰身
赤羽有神留絕藝
素旗無誅記連姻

陰功未報天心在
累將重侯又幾人
潘安仁楊使君誄有表之素旗之句

喬與子皆毛氏之壻

贈王仙翁道成

覽照休驚白髮新
奕棋翻覆見來頻
燕南趙北留詩卷

王後盧前盡故人平地青雲一爐藥舊都喬木百年身
憑君剝醉浮香酒館名梁苑而今不筭春

常仲明教授挽辭

雲際虛瞻處士星豈知談笑已忘形鎮州肥膩無毫髮
晉產真淳有典型白帽枉教淹晚節綠囊元擬濟含靈
汝南後日先賢傳猶欠知幾為勒銘常代州崞縣人客
郟城與知幾游從

知靈臨終
殊明了

追錄舊詩二首

短褐單衣長路塵十年回首一吟呻
孤居無着竟安往宿債未償今更新
相馬自甘齊俗瘦食鮭誰顧庾郎貧
聞君話我才名在不道儒冠已悞身

自用韻答
張之純

潦倒聊為隴畝民一犁分得雨聲春
功名何物堪人老天地無心誰我貧
賴上雲烟隨處好洛陽桃李幾番新
悠悠世事休相問年夢今年晚得辛

用崔懷
祖韻

丁未寒食歸自三泉

春山晴煖紫生煙山下分流百汊泉
未放小桃裝野景

已看茅屋映秋千，飢鳥得食爭相喚。
醉叟行歌只自顛，寒食明年定何許。
故人尊酒且留連。

即事呈邦瑞

鄭莊父子重相留，似為良辰散客愁。
陋巷新成一茅屋，今年連醉兩三秋。
開尊便覺賢人近，汗足寧論力士羞。
明日燕臺傳盛事，坐中賓客盡名流。

和白樞判李定齋有詩寄白以因風何惜數行
書為落白白酬荅云欲搜春草池塘句藥裏

關心夢不成余平解之

金粟崗頭有髮僧
遙知默坐對龕燈
書郵但覺浮沉久
詩卷何緣唱和曾
白日放歌須縱酒
清朝有味是無能
相逢定有池塘句
藥裹關心恐未應

慶高評事八十之壽

圖畫堯民太朴存
衣冠兼得見高門
種松千歲如種德
教子一經今教孫
化日舒長留暮景
秋風搖落變春溫
聘君羔鴈休疑晚
正及新年薦壽尊

超然王翁哀挽

直擬期頤薦壽尊却從圖畫記生存百年喬木衣冠古
一夕西庵笑語溫故事未霑通德里素風多負讀書孫
吳陳諸老今誰在滅沒歸鴻是薊門

大名贈答張簡之

營平豪宕變溫文所見今知勝所聞只道生涯無長物
爭教詩壘策竒勳伐薪未敢煩名士載酒能來過子雲
後日山陽養衰疾藥籠僂品正須君

燕都送馬郎中北上

功曹此日漢蕭何家世當年老伏波但愛紅蓮映芳渚
豈知寒谷變陽和珠囊不載模糊錦銀管先書茂異科
太史占天應有喜一星朝處五雲多

馬雲漢方鏡背有飛魚

劫火依然百鍊初護持元自有神魚影寒似覺雲屏透
光落應分玉斗餘開朗休嫌露圭角圓通寧復滯方隅
衣冠正了渾閑在一片靈臺欲付渠

贈荅鴈門劉仲脩

并序

仲脩省郎乘傳過新興有詩見及推激過稱甚
非哀謬所宜得者媿汗之餘輒用韻為謝仲
脩詩律深密得於尊公鳳山老人過庭之訓
且其言壯絕類吾友李從事長源故篇中有
及

車騎雍容一坐傾并州人物未凋零共知祭酒傳家學
劉向為劉氏祭酒獨愛中郎餘典刑東壁圖書欣有託南溟風

浪駭初經少微見比吾何敢洗眼仙槎候客星

餘慶堂

五年霜戟照康莊萬里春風擁畫梁已覺并汾增勝氣
更從王郝借餘光靈椿丹桂知難老玉節金符豈易量
剩着牋毫授辭客南堂兼是棟華堂

寄答劉生

西州消息到東山懷袖新詩百過看白壁明珠驚照座
朔雲寒雪入憑欄省郎共結交情厚野老還欣禮數寬

後日秋風一尊酒草堂應得駐金鞍

別董德鄉

爛醉秋風四十場此回歌笑重難忘揚雄詞賦今誰識
陶令田園先已荒同甲弟兄雖異姓宦游州郡即吾鄉
懸知後日登高地剩為行人望太行

送端甫西行

瀛州人物早知名車騎雍容一座傾美酒清歌良有味
綠波春草若為情渭城朝雨三年別平地青雲萬里程

老我秦游舊曾約夢中仙掌已相迎

讀李狀元朝宗禪林記

李守濟州城破不屈節死贈鄉郡刺史

偶向禪林見舊文濟陽南望為沾巾張巡許遠古亦少
烈日秋霜今更新千字豐碑誰國手百城降表盡王臣
知君不假科名重元是中朝第一人

同嚴公子大用東園賞梅

東閣官梅要洗粧青雲公子不相忘翰林風月三千首

樂府金釵十二行佳節屢從愁裏過老夫聊發少年狂
花行更比梳行好誰道并州是故鄉

中庸先生垂示先大夫教子詩及裴內翰擇之
所述家傳愛仰不足情見乎辭

嚴訓常如日照名家元自古今同只知楊秉餘清節
爭信譙玄有素風

獨行傳
第一人

通德里門傳故事安平韻語

到兒童青青留在懷賢樹愛殺曹南一畝宮

賀中庸老再被恩綸

金史卷之八十三
卷十
萬古千秋麗澤堂紫泥恩詔姓名香治朝例有高年敬
神理終歸晚節昌東魯儒生傳舊學南曹方志發幽光
季春羔雁秋風酒准擬年年薦壽觴

趙汲古南園

分得
軍字

林園近與六街鄰塵漲都歸一水分魚樂定從濠上得
竹香偏向雨中聞接籬倒著容山簡老屋高眠稱陸雲
尊酒相陪有今日却慙詩壘不能軍

柳亭雨夕與高御史夜話

關塞無緣笑語同
偶然情話此從容
青天蜀道不得過
山色歸心空自濃
九日茱萸藍澗酒
十年朝馬景陽鐘

三間老屋知何處
惆悵雲間陸士龍

高曾自藍田令人
拜監察御史北渡

後謀還保塞而困於
無資者二十年矣

玉峯魏文哀挽

風馭翩翩渺獨征
幾人終始復哀榮
祗緣大事存遺藁
重為斯文惜主盟
北斗泰山初未減
秋霜烈日凜如生
莫疑知己無從報
直筆君看戮進明

清明日改葬阿辛

掌上青紅記點粧
今朝哀感重難忘
金環去作誰家夢
綵勝空期某氏郎
一瞥風花纔過眼
百年冰槩若為揚
孟郊老作枯柴立
可待吟詩哭杏殤

寄謝常君卿

百過新篇卷又披
得君重恨十年遲
文除嶺外初無例
詩學江西又一奇
楊柳不隨春事老
貞松惟有歲寒知
仙鄉白鳳瀛州近
洗眼雲霄看後期

送武誠之往漢陂

太原酒政瑞甫之父此時為黃冠

行李中春發晉溪離筵辭客賦新題青雲有路人看老
秋水無言物自齊杜曲舊遊頻入夢兵厨佳釀惜分攜
因君為向蓮峯道不待移文我亦西

送劉子東遊

劉郎世舊出雄邊生長幽并氣質全陣馬風檣見豪舉
雪車冰柱得真傳書空咄咄知誰解擊缶鳴鳴頗自憐
後日東州飽歸載且休多送酒家錢

甲寅九日同臨漳提領王明之鹿泉令張奉先
賈千戶令春李進之冀衡甫遊龍泉寺僧顯

求詩二首

遠樹寒煙接戍樓
黃花白酒浣羈愁
霜林染出雲錦爛
春色併歸風露秋
鄉社歲時容客醉
石牆名姓為僧留
登高舊說龍山好
從此龍泉是勝遊

柿葉殷紅松葉青
黃花霜後獨鮮明
西風浩浩欲吹帽
石溜泠泠堪濯纓
皇統貞元見題宇
良辰美景記升平

何人解得登臨意滅沒疎雲雁一聲

十日作

關樹蕭條返照明井徑西北筭歸程青黃大似溝中斷
文字空傳海上名平地煙霄遽如許秋風茅屋可憐生
重陽擬作登高賦一片傷心畫不成

贈答普安師

入座臺山景趣新因君鄉國重情親金芝三秀詩壇瑞
寶樹千花佛界春聞道舊傳言外意忘年今得眼中人

種蓮結社風流在會向藍輿認後身

孝純宛丘遷奉

張弟新舉第二雛聞其玉雪可念因以字之

鬢毛哀颯面塵埃孝子牽車古所哀千里長河限南北
一丘寒土見蒿萊遼東華表何人在柳氏玄堂此日開
十月知君有新喜小雛先與喚迎來

曹壽之平水之行

關塞相望首重搔相逢哀颯嘆顛毛驪珠可忍輕彈雀
糖餌何緣得釣鰲從昔丘園昌晚節向來山岳揔秋毫

西風先有龍門約共舉一杯持兩螯

追懷趙介叔

今古人門各一時燕南荆有桂林枝清風明月懷玄度
綠水紅蓮見杲之善政傳歸遺愛頌陰功留在稱家兒
哀歌不盡平生意空想翛然瘦鶴姿

追懷友生石裕卿

人物休評第幾流依然豪俠數并州壯懷歌闕尊為破
連句才多筆不休金馬只教聊避世玉犀誰道失封侯

酒酣握手今無復惆悵西園是舊遊

挽雁門劉克明

詩骨翛然野鶴孤
兩年清坐記圍爐
金初宋季聞遺事
帛靡波流見古儒
已分幽人嗟古柏
爭教孺子奠生芻
鳳山後日先賢傳
再有劉宗祭酒無

贈答平陽仇舜臣

兩辱攜詩過草堂
曹君師席有輝光
飛騰自是功名具
潦倒何堪翰墨場
滄海驪珠能幾見
豐城龍劍不終藏

太行殘雪春風近且趁梅花薦壽觴

仇乃曹益夫門生也

賈漕東城中隱堂

智水仁山德有鄰柳塘花塢靜無塵
家僮解誦閑居賦田父爭持社壘春
安吉總輸中隱士典刑真見老成人
明年恰入非熊運共看青蒲裏畫輪

約嚴侯泛舟

風物當年小洞庭西河此日展江亭
詩貪勝槩題難徧酒怯清秋醉易醒
白鳥無心自來去紅渠照影亦娉婷

仙舟共載平生事未分枯槎是客星

送李同年德之歸洛西二首

千佛名經有幾人棲遲零落轉情親
承平盛集今無復哀樂中年語最真
衣上緇塵元自化鏡中白髮為誰新
水南水北相逢在剗醉醱醱十日春

三奈流光冉冉何逢君聊得慰蹉跎
飛黃老去空奇骨拙燕歸來只舊窠
舉世盡從愁裏過一尊獨愛醉時來
洛中定有人相問休道今年白髮多

贈蕭漢傑

蕭漢傑大興人金國初嘗賜姓敖拉氏故時人

又謂之敖拉漢傑父

仲寬

居之飛龍榜登科同

知青州軍州事致仕有子六人皆使宦學獨漢

傑不樂

去聲

遂作舉子為人慷慨有志膽好讀書

古兵法及陰陽孤虛祿命之術從軍二十年積

官從三品領虢州倅關陝總帥府提控佩金符

蓋自燕城圍解之後間關南渡出入行陣間瀕

於死者屢矣鐵嶺之潰復入陝州陝州亂羣不
逞輩繫漢傑獄中漢傑乘昏暮破械而出懼為
追者及駕浮壺亂黃流筋疲力涸僅達北岸為
失侯故將者又二十年流離頓踣人所不能而
意氣都不少哀以人情觀之豈碌碌者所可辦
耶壬子冬與予相值於東原問其世知其為故
人大鈞之同母也問其日事則曰止以唐生季
主之業游時貴間耳因與論余之行年而有契

於余心者私竊慨嘆以為倚伏叵測哀與樂相
尋生也有涯而跼於憂畏浩浩乎如乘舟而遇
風波非知其亡可奈何而安之其可以收利涉
之功乎漢傑為有得矣其別也因為長句以贈
射虎將軍右北平短衣憔悴宿長亭雷轟寶劍無留迹
火借青囊為乞靈四壁不知貧作崇一瓢誰識醉中醒
相逢莫話搢機石自省枯槎是客星

送曹幹臣

和林音驛日懷思燕市歌歡有此時老我真成鐵爐步
感君時送草堂背黃楊舊厄三年閏赤驥非無萬里姿
平地煙霄付公等不妨閑和鳳池詩

國醫王澤民詩卷

萬古君家父事兄豈知哀俗有王卿一篇華袞中書筆
滿紙清風月旦評鴻雁自分先後序鶴鴿兼有急難情
閨門雍睦君須記方伎成名恐未平

祖唐臣母挽章

白髮承平一夢過，怡然冠帔見慈和。
肩輿與燕喜，今無復手綫留殘恨。
更多舍內已甘非，穎谷學仙何敢望。
西河升堂結友平生事，重為王君廢蓼莪。

丙辰九月二十六日挈家游龍泉

風色澄鮮稱野情，居僧聞客喜相迎。
藤垂石磴雲添潤，泉漱山根玉有聲。
庭樹老於臨濟寺，霜林渾是漢家營。
明年此日知何處，莫惜題詩記姓名。

感寓

南楊北李門中老樂丈張兄病且貧叔夜呂安誰命駕
牧童田父實為鄰功名富貴知何物風雨塵埃惜此身

歌酒逢場暫陶寫不應嫌我醉時真

李仁卿楊正卿
樂舜咨張緯文

存歿

辛老敬之
劉兄景玄

行間楊趙提衡早老去辛劉入夢頻
按上酒杯聊自慰袖中詩卷欲誰親
兩都秋色皆喬木一代名家不數人
汲冢遺編要完補可能虛負百年身

人日有懷愚齋張兄緯文

書來聊得慰懷思清鏡平明見白髭明月高樓燕市酒
梅花人日草堂詩風光流轉何多態兒女青紅又一時
潤底孤松二千尺殷勤留看歲寒枝


趙元德御史兄七秩之壽

富貴浮雲世態新典刑依舊老成人松身鶴骨詩千首
玉潤冰清德有鄰已卜新居近泉石不應晚節傍風塵
平頭七十從頭數才是梅溪第一春

張村杏花

丁巳二月
初二日

昨日櫻脣絳蠟痕今朝紅袖已迎門
只應芳樹知人意
留著殘粧伴酒樽
穠李尚須修粉豔
寒梅空自怨黃昏
詩家元白無今古
從此張村即趙村



遺山集卷十

欽定四庫全書

集部

遺山集卷十二

詳校官中書臣沈颺

主事臣呂雲棟覆勘

總校官編修臣倉聖脉

校對官中書臣葉蘭

謄錄監生臣任卬喧

欽定四庫全書

遺山集卷十一

金 元好問 撰

五言絕句

洛陽高少府瀍陽後庵五首

溪上弄明月風露發新警
心空無一塵萬竹掃秋影
一水隨人意疏畦復芋溝
風波河洛近莫放出山流
韭早春先綠松肥秋未黃
殷勤遠畦水終日為君忙
地僻境逾靜林疎秋已分
清溪一片月脩竹四山雲

方外人長樂山中物自幽百年梅福隱萬古謫仙遊

內鄉襍詩

犬吠桃源近鶯聲柳巷深蒼苔留醉卧青竹伴幽尋

薛明府去思口號七首

能吏尋常見公廡第一難只從明府到人信有清官
畫諾由官長昂頭顧吏頻只從明府到判筆不傳神
麋鹿山中盡公厨破幾錢只從明府到獵戶得安眠
木索人何罪繫繫滿獄中只從明府到牢戶二年空

驛舍無歌酒清談了送迎即看明府去畫鼓有新聲
舊日逃亡國鎌鉏色色新即看明府去還作賣牛人
疾惡看平日天然御史材豪姦休鼓舞驄馬即西來

山居雜詩六首

瘦竹藤斜挂幽花草亂生林高風有態苔滑水無聲
石潤雲先動橋平水漸過野陰添晚重山意向秋多
樹合秋聲滿村荒暮景閑虹收仍白雨雲動忽青山
川迥楓林散山深竹港幽踈烟沉去鳥落日送歸牛

漲落沙痕出堤摧岸口斜斷橋堆聚沫高樹閣浮槎
鷺影兼秋靜蟬聲帶晚涼陂長畱積水川濶盡斜陽

梁父吟扇頭

孔明箕踞坐大石上望月作梁父吟

盤礴萬古心塊石入危坐青天一明月孤唱誰與和

南樓月夕望鳳山有懷武鍊師子和

相望不相見山中君得知南樓今夜月也到洗參池

辛亥寒食

寒食年年好今年迥不同秋千與花影并在月明中

山中晚春

雲光金碧聚林煙，綵翠新山花發較晚。今年兩見春

得緯文兄書

鵲語喜復喜，山城誰與娛。青燈一杯酒，千里故人書。

乙巳九月二十八日作

關山小雪後，絮帽北風前。殘月如新月，今年老去年。

六言

定齋兄寫真

朱黃筆底三篋白黑胃中兩碁畫作蕭然野服雲龍蔽
日駸駸

巨然秋山為鄧州相公賦

筆端遊戲三昧物外平生往還為問阿師何在白雲依
舊青山

德和墨竹扇頭

靜裏離離新粉動時細細清香明月清風自在紅塵白

日何妨

嫩香新粉墨離
離李長吉竹詩

曹得一扇頭

機中秦女仙去月底梅花晚開只見一枝踈影不知何處香來

唐子達扇頭

溪光冷於冰山骨淨如玉白雲自老人自閑莫遣秋風破茅屋

七言絕句

論詩三十首

丁丑歲
三鄉作

漢謠魏什久紛紛正體無人與細論誰是詩中䟽鑿手
暫教涇渭各清渾

曹劉坐嘯虎生風四海無人角兩雄可惜并州劉越石
不教橫槊建安中

鄴下風流在晉多壯懷猶見鐵壺歌風雲若恨張華少

溫李新聲奈爾何

鍾嶸評張華詩恨其
兒女情多風雲氣少

一語天然萬古新豪華落盡見真淳南窓白日羲皇上

未害淵明是晉人

柳子厚晉之謝靈運
陶淵明唐之白樂天

縱橫詩筆見高情何物能澆磊砢平
老阮不狂誰會得出門一笑大江橫

心畫心聲總失真文章仍復見為人
高情千古閑居賦爭信安仁拜路塵

慷慨歌謠絕不傳穹廬一曲本天然
中州萬古英雄氣也到陰山救勒川

沈宋橫馳翰墨場風流初不廢齊梁
論功若准平吳例合着黃金鑄子昂

闕靡誇多費覽觀陸文猶恨冗於潘心聲只要傳心了

布穀瀾翻可是難

陸蕪而潘靜語見世說

排比鋪張持一途藩籬如此亦區區少陵自有連城壁

爭奈微之識砭砭

事見元稹子美墓誌

眼處心生句自神暗中摸索絕非真畫圖臨出秦川景

親到長安有幾人

望帝春心託杜鵑佳人錦瑟怨華年詩家總愛西崑好

獨恨無人作鄭箋

萬古文章有坦途縱橫誰似玉川盧真書不入今人眼
兒輩從教鬼畫符

出處殊途聽所安山林何得賤衣冠華歆一擲金隨重
大是渠儂被眼謾

筆底銀河落九天何曾顛悴飯山前世間東抹西塗手
枉着書生待魯連

切切秋蟲萬古情燈前山鬼淚縱橫鑑湖春好無人賦
岸夾桃花錦浪生

切響浮聲發巧深
研摩雖苦果何心
浪翁水樂無宮徵

自是雲山韶濩音

水樂次山事又其款乃曲云停梳
靜聽曲中意好是雲山韶濩音

東野窮愁死不休
高天厚地一詩囚
江山萬古潮陽筆

合在元龍百尺樓

萬古幽人在澗阿
百年孤憤竟如何
無人說與天隨子

春草輸羸校幾多

天隨子詩無多藥草在南榮合有新
苗次第生稚子不知名品上恐隨春

草闕
輸羸

謝客風容映古今
發源誰似柳州深
朱絃一拂遺音在

却是當年寂寞心

窮步相仍死不前
唱酬無復見前賢
縱橫正有凌雲筆
俯仰隨人亦可憐

竒外無竒更出竒
一波纔動萬波隨
只知詩到蘇黃盡
滄海橫流却是誰

曲學虛荒小說欺
俳諧怒罵豈詩宜
今人合笑古人拙
除却雅言都不知

有情芍藥含春淚
無力薔薇卧晚枝
拈出退之山石句

始知渠是女郎詩

亂後玄都失故基看花詩在只堪悲劉郎也是人間客
枉向春風怨兔葵

金入洪鑪不厭頻精真那計受纖塵蘇門果有忠臣在
肯放坡詩百態新

百年纔覺古風迴元祐諸人次第來諱學金陵猶有說
竟將何罪廢歐梅

古雅難將子美親精純全失義山真論詩寧下涪翁拜

未作江西社裏人

池塘春草謝家春萬古千秋五字新
傳語閉門陳正字
可憐無補費精神

撼樹虬螭自覺狂書生技癢愛論量
老來留得詩千首
却被何人校短長

文湖州草蟲為劉使君賦

造物無心筆有神翩翩飛動百年新
蟲魚瑣細君休笑
學會屠龍老却人

京都元夕

袿服華粧着處逢六街燈火鬧兒童長衫我亦何為者
也在游人笑語中

西園

百草千花雨氣新今朝陌上有遊塵皇州春色濃於酒
醉殺西園歌舞人

藍采和像

長板高歌本不狂兒曹自為百錢忙幾時逢着藍衫老

同向春風舞一場

鴛鴦扇頭

雙宿雙飛百自由
人間無物比風流
若教解語終須問
有底愁來也白頭

杏花雜詩十三首

杏花牆外一枝橫
半面宮粧出曉晴
看盡春風不迴首
寶兒元自太憨生

露華浥浥泛晴光
睡足東風倚綠窓
試遣紅粧映銀燭

湘桃爭合伴僊郎

嫋嫋纖條映酒船
綠嬌紅小不勝憐
長年自笑情緣在
猶要春風慰眼前

煖日園林可散愁
每逢花處儘遲留
青旗知是誰家酒
一片春風出樹頭

紛紛紅紫不勝稠
爭得春光競出頭
却是梨花高一着
隨宜梳洗儘風流

露浥清華粉自添
隔溪遙見玉簾苫
眼看桃李飄零盡

更揀繁枝挿帽簷

小橋南北夢幽尋
殘醉曹騰不易禁
一樹杏花春寂寞
惡風吹折五更心

西山漠漠有無中
幾日園林幾樹紅
燕子銜將春色去
錯教人恨五更風

屈指殘春有別期
春風爭忍片紅飛
若為釀得千日酒
醉着東君不放歸

楚客離魂不易招
野春平碧水迢迢
垂楊也被多情惱

瘦損春風十萬條

小雨班班曉未勻
烟光水色畫難真
西園春物知多少
一樹垂楊惱殺人

魏紫姚黃有重名
洛陽車馬鬧清明
吹殘桃李風纔定
可是東君別有情

紅粧翠蓋惜風流
春動香生不自由
莫向芸齋厭閒冷

小詩供作錦纏頭

韓偓燕三清之瑞露春動七情咀五色之靈芝香生九竅

出京

巫峽歸雲底處尋
高城渺渺暮煙沉
春風不剪垂楊斷
繫盡行人北望心

惠崇蘆鴈三首

寒沙折葦靜相依
故國春風早晚歸
意外羈棲誰畫得
羽毛單薄稻粱微

鴈奴辛苦候寒更
夢破黃蘆雪打聲
休道畫工心獨苦
題詩人也白頭生

江湖牢落太愁人
同是天涯萬里身
不似畫屏金孔雀

離離花影淡生春

早起

北舍南鄰獨樂聲
裊衣晨起覺秋清
豆田欲熟朝朝雨
喚殺雙鳩不肯晴

書生

書生千古一齋腸
蓋世功名不自償
更笑登封武明府
兩盃白粥半生忙

銅雀臺瓦硯

愛惜鈿花洗又看
畫欄桂樹雨聲寒
千年不作鴛鴦去
喚得書生笑老瞞

步虛詞三首

後二首三
鄉時作

閨苑仙人白錦袍
海山宮闕醉蟠桃
三更月底鸞聲急
萬里風頭鶴背高

萬神朝罷出通明
和氣歡聲滿玉京
見說人間有新異
綠章封事謝升平

琪樹明霞碧落宮
歌音嫋嫋度冷風
人間聽得霓裳慣

猶恐鈞天是夢中

拙庵為溫甫賦

毫端棘末幾人爭
愚智相懸賦分平
畢竟世間誰是巧
鬢毛愁白可憐生

風雨停舟圖

老木高風作意狂
青山和雨入微茫
畫圖喚起扁舟夢
一夜江聲撼客床

納涼張氏庄二首

小橋深竹午風便一道垂楊帶亂蟬
山下行人遮日去却從茅屋問瓜田

樹陰環合水縈回樹下行人坐綠苔
絕似藜蒙山下路

眼中唯欠繫舟嵬

藜蒙繫舟皆鄉中山鄉人謂之繫舟嵬

送窮

日吉時良利動遷可能顏巷卜終焉
主人不倦星奴倦
辛苦年年縛草船

楊柳

楊柳青青溝水流鶯兒調舌弄嬌柔
桃花記得題詩客
斜倚春風笑不休

梁縣道中

青山簇簇樹重重人在春雲浩蕩中
也是杏花無意況
一枝臨水卧殘紅

自題寫真二首

山林日月老潛夫骨入窮泉未擬枯
幽澗有冰含太古

無人和玉試洪鑪

孫綽雖沒泉
壤尸宜不朽

一派春煙澹不收
漁家已許借扁舟
山林且莫蹉跎去
莫問人間第幾流

再題

高談世事真何者
多竊時名亦偶然
山鹿野麋君自看
擬從何地著貂蟬

吳子英家靈照圖二首

船入西江萬有空
漉籬活計百錢功
阿靈了却無生話
想得蕭然似卷中

抱犢山高記洛川寸腸西去似繩牽而今恰羨龐家好

兒女生來只眼前

時女嚴在盧氏約歸寧未至

劉鄧州家聚鴨圖

沙浦空明洲景微
枯荷折葦澹相依
若為化作江鷗去
拍拍隨君貼水飛

戊子正月晦日內鄉西城遊眺

雄蜂雌蝶為花狂
陌上遊人醉幾場
前日少年今白髮
却來閑處看春忙

長壽山居元夕

微茫燈火共荒村
黃葉漫山雪擁門
三十九年何限事
只留孤影伴黃昏

聞仲澤丁內艱

升堂未幾訃音聞
凶服哀羸日念君
昨夜東南雷雨惡
遙知號哭遶新墳

贈眼醫武濟川

世眼紛紛昧是非
不應刮膜在金篦
知君聖處工夫到

且道心盲作麼醫

賦粹中師竹拂子

了却香巖一繫緣滿梳華髮伴談玄誰知拂月披風意
已具鈴鉞未落前

題伊陽楊氏戲虎圖

大班哆笑口侵耳小班蓄縮如乞憐戲鬪真成兩勦敵
發機誰在卞莊前

王子端內翰山水同屏山賦二首

鄭虔三絕舊知名付與時人分
重輕遼海東南天一柱
曾中誰比玉崢嶸

萬里承平一夢間
風流人物與江山
眼明今日題詩處
却見明昌玉笋班

右司正之家渭川千畝圖二首

官街塵土霧中天
人眼荒寒一灑然
大似終南山下看
北風和雪捲蒼煙

老眼蕭郎筆有神
巖姿洲景盡天真
情知一段幽閒趣

不必清談着晉人

同希顏欽叔玉華谷分韻得軍華二字二首

並山一逕入秋雲草樹低迷劣可分開道無煩謝康樂

挽彊須得李將軍

時有虎害
故戲云

深山水木湛清華興到窮探亦未涯轉石猶能起雷雨
題詩自合動煙霞

同希顏欽叔玉華谷還會善寺即事二首

高風捲盡四山雲泉石煙霞得細分大是山靈設清供

惜無佳句答殷勤

詩翁徹骨愛煙霞，別似劉君住玉華。鐵笛不曾從二草。

頭巾久已挂三花。

趙隱之子端，同年進士，令任城為猾吏，所誣遂隱居。今年八十餘，自言胎

仙已成，不久去世云。

從鄧州相公覓酒時在鎮平

寒日山城雪四圍，空齋孤坐意多違。江洲未覺風流減，可使陶潛望白衣。

鎮平寄姪孫伯安筆

隆顱犀角掌中珠不見經年日念渠領取阿翁鄭管筆
試教學寫問安書

黃筌龜藏六圖為張左丞賦

無心舒卷付皇天不幸劓腸亦偶然世上疑謀待君決
可能藏六便安全

鎮平書事

勸農冠蓋已歸休了却逋懸百不憂可是諸人哀老子
半窓紅日擁黃紬

自鎮平暫往秋林道中寄家

風雨塵埃了半生
西山歸去眼增明
浮雲夫婿今如此
莫遣迎門有嘆聲

超化

秋風嫋嫋入僧窓
盡得諸山草木香
却恨大梁三日醉
不來超化作重陽

又云擬借扁舟弄秋水
自嫌塵土浣沙鷗餘不記

山居二首

斜陽高樹挂晴虹
肅肅微涼雨氣中
一道鷺鷥花不斷

蜜香吹滿馬頭風

詩腸搜苦怯茶甌
信手拈書却枕頭
簷溜滴殘山院靜
碧花紅穗媚涼秋

寄女巖三首

鶴崖魚窟路間關
旬月無由一往還
寒食歸寧見鄰女

舉家迴首望西山

鶴崖魚窟在內鄉往盧氏道中

添丁學語巧於絃
詩句無人為口傳
竹馬幾時迎阿姊

五更教誦木蘭篇

眼前兒女最關情
不見經年百感并
聞道全家解禪理
擬從香火問無生

自鄧州幕府暫歸秋林

升斗微官不療饑
中林春雨蕨芽肥
歸來應被青山笑
可惜緇塵染素衣

無題二首

七十鴛鴦五十絃
酒薰花柳動春煙
人間只道黃金貴
不問天公買少年

春風也解惜多才
嫁與桃花不用媒
死恨天台老劉阮
人間何戀却歸來

題省掾劉德潤家驂鸞圖并為同舍郎劉長卿

記異劉在方城先有碧簫之遇如芙蓉城事云
千劫情緣萬古期
樓中蕭史姓名非
洞天花落秋雲冷
腸斷青鸞獨自飛

希顏挽詩五首

官街寥落在銘旌
才命寧論重與輕
不作漢家賢傳去

空勞明主識蕭生

溘馬溟漠旌紀寂寞
魏書隱逸傳中語

山立揚休七尺身紫髯落落照青春從教不入麒麟畫
猶是中朝第一人

人間無路問天公自古才難更阨窮日月不為千載計
江山長惜萬夫雄

萬古文章有正傳驂騑爭道望君先傷心一入重泉後
再得斯人又幾年

一世龍門屬李膺待君提拂遂騰升千年荆棘龜趺在

會有人尋下馬陵

出鄧州

本無竒骨負功名取次誰教髀肉生未到白頭能幾日
六年留滯鄧州城

過希顏故居四首

缺壺聲裏短歌行星斗闌干醉膽橫虎視鷹揚何處在
道邊孤冢可憐生

鶴蓋成陰着處同一時人物酒盃中臣門如市心如水

世俗論

平聲

量恐未公

暮去朝來萬化途
飛揚跋扈亦區區
劇談不盡平生意
能有精微入夢無

把臂論交分最深
三夫成虎古猶今
百年唯有區區在
地下纔應識此心

雜著九首

萬期流轉不須臾
物物觀來定有無
玉席紙衣全一盡
枉將白骨計榮枯

鳧短何如鶴有餘非魚誰謂子知魚一枝莫作鷓鴣看
水擊三千不羨渠

太虛空裏一遊塵造物雖工未易貧臧獲古來多鼎食
可能夷叔是飢人

青蓋朝來帝座新豈知衛瓘是忠臣洛陽荆棘千年後
愁絕銅駝陌上人

六國孱王走下風神人鞭血海波紅無端一片云亭石
殺盡蒼生有底功

天上河源地上流
黃金浮世等閑休
埋愁不著重泉底
儘向人間種白頭

泗水龍歸海縣空
朱三王八竟言功
圍碁局上猪奴戲
可是乾坤鬪兩雄

昨日東周今日秦
咸陽煙火洛陽塵
百年蟻穴蜂衙裏
笑煞崑崙頂上人

半紙虛名百戰身
轉頭高塚卧麒麟
山間曾見漁樵說
辛苦凌煙閣上人

戚夫人

鴻鵠冥冥四海飛，戚夫人舞淚霑衣。
無端恨殺商山老，剛出山來管是非。

題山谷小艷詩

法秀無端會熟謾，笑談真作勸淫看。
只消一句脩脩利，李下何妨也整冠。

家山歸夢圖三首

別却并州已六年，眼中歸路直於弦。
春晴門巷桑榆綠。

猶記騎驢掠社錢

繫舟南北暮雲平
落日滹河一線明
萬里秋風吹布袖
清暉亭上倚新晴

遊騎北來塵滿城
月明空照漢家營
卷中正有家山在
一片傷心畫不成

四皓圖

身墮安車厚幣中
白頭塵土澆西風
當時且下山間老
羽翼區區有底功

雜著

老優慣著沐猴冠却笑傍人被眼謾造物若留殘喘在
我儂試舞你儂看

遺山集卷十一

欽定四庫全書

遺山集卷十二

金 元好問 撰

七言絕句

俳體雪香亭雜詠十五首

亭在故汴宮
仁安殿西

滄海橫流萬國魚茫茫
神理竟何如六經管得書生下
濶劍長鎗不信渠

洛陽城闕變灰煙
暮號朝虞只眼前
為向杏園雙燕道
營巢何處過明年

落日青山一片愁，大河東注不還流。
若為長得熙春在，時上高層望宋州。

醇和旁近洞房環，碧瓦參差竹木閑。
批奏內人輪上直

去年名姓在窓間

醇和
殿名

天上三郎玉不如，手中白雨趁花奴。
御屏零落宣和筆，畱得華清按樂圖。

詩仙詩鬼不謾欺，時事先教夢裏知。
禁苑又經人物散

荒涼臺榭水流遲

十年前商帥國器方城夢
中得後二句為言如此

金縷歌詞金曲卮百年人事鬢成絲
重來未必春風在
更為梨花住少時

楊柳隨風散綠絲
桃花臨水弄妍姿
無端種下青青竹
恰到湘君淚盡時

琵琶心事曲中論
曾笑明妃負漢恩
明日天山山下路
不須回首望都門

爐薰氤氳帶輕陰
翠竹高梧水殿深
去去羶車雪三尺

畫羅休縷麝香金

泥金色如麝
香宮中所尚

羅綺深宮二十年更持桃李向誰妍
人生只合梁園死
金水河頭好墓田

苦才多思是春風偏近騷人
悵望中啼盡杜鵑枝上血
海棠明日更應紅

暖日晴雲錦樹新
風吹雨打旋成塵
宮園淡閉無人到
自在流鶯哭暮春

萬戶千門盡有名
眼中歷歷記經行
賦家正有蕪城筆
一段傷心畫不成

暮雲樓閣古今情
地老天荒恨未平
白髮纍臣幾人在
就中愁殺庾蘭成

春夕

數枝殘雪梅仍在
幾日東風柳已嬌
春酒價高無可典
小紅燈影莫相撩

梅花

一樹寒梅古寺邊
荒山草木動春妍
東家賴有詩人在
照影橫枝莫自憐

溪上

短布單衣一幅巾
暫來閑處避紅塵
低昂自看水中影
好箇山間林下人

息軒楊祕監雪行圖

長路單衣怨僕僮
無人說向息軒翁
長安多少貂裘客
偏畫書生著雪中

楊煥然生子四首

掌上明珠慰老懷
愁顏我亦為君開
異時載酒揚雄宅

知有迎門竹馬來

人家歡喜是生兒
巷語街談總入詩
我欲去為湯餅客
買羊沽酒約何時

半生辛苦坐耽書
我笑先生老更迂
生子但持門戶了
玄談何必似童烏

阿麟學語語牙牙
七歲元郎髻已丫
更醉使君湯餅會

兒童他日記通家

阿麟張君
美兒子

記夢

天上材官老不材從教兀兀走塵埃夢中望拜通明殿

曾見金書兩字來

戊子七月二十四日內鄉往盧氏宿走馬坪夜夢拜天帝像遂觀法駕導

引畫幀最前負弩三人中有金書小字題裕之者夢中不自知其為予也

啓母石

書載塗山世共知誰傳頑石使人疑可憐少室老突兀
也被人呼作阿姨

雜著四首

白髮劉郎老更痴人間那有後天期茂陵石馬專相待

種下蟠桃屬阿誰

白髮中官解道詩殷勤仍為惜花枝
雪香亭上清明宴
記得君王去歲時

六朝瓊樹掌中春
迴首胡粧一面
新生羨石家金谷裏
千年獨有墜樓人

燕語鶯啼百轉新
長廊寂寂不逢人
東君去作誰家客
花柳無情各自春

內鄉雜詩

行吟溪北復溪南
風日烘人酒易酣
無限春愁與誰語
梅花嬌小杏花憨

眉二首

香墨燒殘水麝塵
內家新樣入輕勻
郭熙只為吳山老
爭信窓間有小顰

石綠香煤淺淡間
多情長帶楚梅酸
小詩擬寫春愁樣
憶着分明下筆難

送窮

煎餅虛拋盞撒堆滿城都道送窮迴不如留取窮新婦
貴女何曾喚得來

三鄉時作

山林鐘鼎不相兼說着浮名夢亦嫌菽水盡歡吾豈敢
老親自愛薺羹甜

出都

春閨斜月曉聞鶯信馬都門半醉醒宮柳青青莫回首
短長亭是斷腸亭

癸巳五月三日北渡三首

道傍僵臥滿纍囚
過去旃車似水流
紅粉哭隨回鶻馬
為誰一步一迴頭

隨營木佛賤於柴
大樂編鐘滿市排
擄掠幾何君莫問
大船渾載汴京來

白骨縱橫似亂麻
幾年桑梓變龍沙
只知河朔生靈盡

破屋踈煙却數家

桑梓其剪為龍
沙乎郭璞語

登珂山寺三首

澹澹長空白鳥迴江山都入妙高臺六鼇只解翻溟渤
不駕東南日觀來

太山在東南而此山不之見

悠悠誰了未生前一落泥塗又幾年堪笑長清郭明府

再來仍被葛藤纏

長清郭明府自省夙世是此寺比丘及作寺碑宛然算沙語也

白日紅塵往復還深居那得似禪關出門應被山僧笑
纔得雲林半日閑

夢中作

夢人請賦四禽語其一泥滑滑也

春泥滑滑滿春山
嬾媿幽禽喚
客還安得便乘雙翼去

綠陰清晝伴君閑

奉詔子京禪師見贈之什三首

南風穩送北歸船
留得虛名一指禪
松少詩僧幾人在
因君迴望一凄然

舊遊重憶故人詩
一點青燈兩鬢絲
不似戒壇明月夜

杏花香裏唱歌時

往在崧山時陪馮內翰雷御史
游戒壇詩中所道蓋當時事也

兵塵千里邈相望
亂後相逢話更長
若見山堂憑借問
幾時同宿贊公房

杏花

桃李前頭一樹春
絳唇深注蠟猶新
只嫌憨笑無人管
開簇枯枝不肯勻

聊城寒食

輕陰何負探花期
白髮於春自不宜
城外杏園人去盡
煮茶聲裏獨支頤

姨母隴西君諱日作三首

竹馬青衫小小郎
阿姨懷袖阿孃香
一龕白骨黃河隔

遙望梁門哭斷腸

病起拈針眼未花團藥兒女運司衙今年得在應猶健
更好從頭說外家

寶鏡煌煌照九州埋藏曾及見諸劉豐城今日無雷煥

紫氣誰當辨斗牛

陽曲劉氏家大寶鏡能照天地四方以前知休咎其家埋地中人不得見

明昌泰和中北方兵動渠父子欲卜之一日先以蓐幕障中庭乃為閉門戶甚嚴及掘鏡出光耀爛然一室盡明如初日之照鏡中見北來兵騎攘攘無數餘三方都無所睹因大駭曰不可不可即埋之姨母時伏床下得竊窺焉兵火後此家唯一兒子在姨母能指鏡處存否則不知也故予詩及之

宿神霄北菴夢中作

素月流空散紫煙座中人物半神仙麗川往事渾如夢
信手題詩一泫然

夜雪

三更殘醉未全醒夢裏嬌兒索乳聲茅屋不知門外雪
黃紬衾煖紙窓明

冠氏趙庄賦杏花四首

一樹生紅錦不如乳兒粉抹紫檐榆花中誰有張萱筆

畫作宮池百子圖

文杏堂前千樹紅
雲舒霞捲漲春風
荒村此日腸堪斷
迴首梁園是夢中

錦樹烘春爛不收
看花人自為花愁
荒溪明日知誰到
憑仗詩翁為少留

東風誰道太狂生
次第開花却有情
聞道紀園千樹錦
一尊猶及醉清明

自趙庄歸冠氏二首

春華澹澹曉寒輕
野草搖風半白青
誰識杏花牆外客
舊曾家近麗川亭

杏園紅過雪披離
楊柳無風綠線齊
寒食人家在原野
乳鴉墻外盡情啼

戲贈白髮二首

鏡中昨日又明朝
破屋春深雪未消
摘下數莖聊自笑
貴人頭上不相饒

問愁何怨復何讐
直要青春便白頭
拚却鏡中渾似雪

且看渠待幾時休

戲題醉仙人圖

醉鄉初不限東西，桀日湯年一理齊。
門外山禽喚沽酒。

胡蘆今後大家提

提胡蘆沽美酒禽語也

濟南雜詩十首

兒時曾過濟南城，暗算存亡只自驚。
四十二年彈指過，只疑行處是前生。

匡山聞有讀書堂，行過山前笑一場。
可惜世間無李白。

今人多少賀知章

華山真是碧芙蓉
渠湖水湖光玉不如
六月行人汗如雨
西城橋下見游魚

吳兒洲渚是神僊
罨畫溪光碧玉泉
別有洞天君不見
鵲山寒食泰和年

石刻燒殘燕集辭
雄樓傑觀想當時
只應畫戟清香地
多欠韋郎五字詩

斫來官樹午陰輕
湖畔游人怕晚晴
一夜靈前菴上宿

四山風露覺秋生

白煙消盡凍雲凝
山月飛來夜氣澄
且向波間看玉塔
不須橋畔覓金繩

入秋雲物便淒迷
一道湖光樹影齊
詩在鵲山煙雨裏

王家圖上舊曾題

玉清鄉家有
鵲山烟雨圖

荷葉荷花爛熳秋
鷺鷥飛近釣魚舟
北城佳處經行徧
留着南山更一游

看山看水自由身
着處題詩發興新
日日扁舟藕花裏

有心長作濟南人

題解飛卿山水卷

平生魚鳥最相親
夢寐煙霞卜四鄰
羨殺濟南山水好
幾時真作卷中人

趙士表山林暮雪圖為高良卿賦二首

颼颼林響四山風
雪後人家閉戶中
應被火爐頭上說
水邊清殺兩詩翁

黃塵遮斷山間夢
白髮重尋畫裏詩
好似玉溪溪上路

醉和王老喚船時

倫鎮道中見槐花

名場奔走競官榮一紙除書悞半生笑向槐花問前事
為君忙了竟何成

題劉才卿湖石扇頭

幽磴雲凝雨未乾曲池踈竹共荒寒扇頭喚起西園夢
好似熙春閣下看

聞歌懷京師舊游

樓前誰唱綠腰催
千里梁園首重迴
記得杜家亭子上
信之欽用共聽來

鄭先覺幽禽照水扇頭

臨水華枝淡淡春
水光華影雨無塵
風流一枕西園夢
惆悵幽禽是故人

龍泉寺四首

懸麻白雨映層崖
過盡行雲晚照開
可是登臨動高興
馬頭新自太行來

泉石煙霞自一家殘僧隨分了生涯雞鳴山下題詩客
曾到靈巖不用誇

河邊殺麋尚能飛無角無鱗自一齊甲子紛紛更兒戲

壁間休笑阜昌題

寺北齊時建又多劉豫
阜昌中石刻并題名

遶渠寒溜夜潺潺說有蛟龍在石間可惜九天霖雨手
一泓泉水伴僧閑

李進之迂軒二首

白髮歸來世事新書生風味是清貧歌斜歷落從人笑

潦倒羸疎我自真

舉世營營共一途
要來閑處費工夫
入門且莫分賓主
不但君迂我亦迂

出鎮州

汾水歸心日夜流
孤雲飛處是松楸
無端行近還鄉路
却傍西山入相州

過邯鄲四絕

富貴榮華一嘆嗟
依然夢裏說莒華
千年幾度山河改

空指遺臺是趙家

人事存亡不易知及時娛樂恨君遲
後人共指叢臺笑三尺堯堦竟屬誰

川原落落曙光開四顧河山亦壯哉
前日少年今白髮只應孤塔記曾來

死去生來不一身定知誰妄復誰真
邯鄲今日題詩客猶是黃梁夢裏人

楊祕監馬圖

大青小青天馬姿楊侯房星非畫師忽見奚官記前事
東華馳道晚涼時

竹溪夢遊圖

意外荒寒下筆親經營慘淡似詩人何時萬頃風煙裏
白髮刁騷一幅巾

藥正卿餉酒

宿醒未解渴生塵驚見王弘餉酒人獨恨文書困佳客
不來同醉五更春

王都尉山水

平林漠漠數峯閑詩在巖姿隱顯間自是秦樓畫眉手
不能辛苦作荆關

贈絕藝杜生

迢迢離思入哀絃非撥非彈有別傳解作江南斷腸曲
新聲休數李龜年

趙大年秋溪戲鴨二首

寒沙折葦浙江彎詩在波痕滅沒間前日扁舟人老矣

却從圖畫羨君閑

畫家朱粉不到處淡墨自覺天機深賣酒壚邊見崔白

王孫真有五湖心

米元章畫史趙昌王友崔白但可為酒家遮牆壁耳

自題二首

共笑詩人太瘦生誰從慘淡得經營千秋萬古迴文錦
只許蘇娘讀得成

千首新詩百首文藜羹不糝日欣欣鏡中自照心語口

後世何須揚子雲

北歸經朝歌感寓三首

南來山勢漸坡陀
蕩蕩川涂接大河
馬上哦詩無好語
聊從白塔記朝歌

黃屋何曾土作階
禍基休指九層臺
書生不見千年後
枉為君王泣玉杯

墨翟區區不近情
迴車曾此避虛名
采薇唯有西山老
不逐時人信武成

內黃道中楚王廟
荆公有誰合軍中
稱亞父却

須推讓內黃兒之句因為范增解嘲

一怒屠城一說留書生剛為范增羞軍中老子關何事
付與兒曹調沐猴

題蘇氏寶章

一老風流有典刑諸郎蘭玉映堦庭
我眉寶氣千年在

未數陳家聚德星

長公忠義似顏平原次公冲澹似林西湖故字畫有不期合而合者最後

數帖所謂蘇氏三虎叔黨為最怒耳

劉氏明遠庵二首

豪氣元龍百尺樓功名場上早抽頭
路人不識閑居士袖手雍容活兩州

世間無物礙虛空宴坐經行一體同
老眼不應隨鏡轉江山元只在胷中

落落雲間晚照開上方別有妙高臺
栽花種柳明年了拄杖敲門日日来

題李庭訓所藏雅集圖二首

萬古文章有至公百年奎壁照河東
衣冠忽見明昌筆

更覺升平是夢中

景星丹鳳一千年合着丹青與世傳誰畫風流王李郝

大河南望淚如川

王謂仲澤李謂長源郝謂仲純

南關二首

風裏秋蓬不自由
一生幾度過隆州
無情團拍關前水
流盡朱顏到白頭

路轉川迴失繫舟
更教兩驛過徐溝
多情團拍關前水

却共清汾一處流

是日自徐溝宿南關

馬坊冷大師清真道院三首

水際茅齋星散居
白雲閑伴五溪魚
茂林脩竹山如畫
蘸碧軒中恐不如

枯蒲折葦障清彎
十里風荷指顧間
安得西湖展江手
亂鋪雲錦浸青山

靜中入境兩脩然
我亦因君有靜緣
已約青山來枕上
水亭風榭看明年

惠崇獐猿圖

月嘯煙呼本不羣
筆頭同是一溪雲
野情山態令人羨
世路機關不似君

寄史同年二首

情話通宵慰別離
殷勤釀酒趁花期
沁南只道梅花早
猶較歸程十日遲

相君許送買山錢
晚歲鄰居定有緣
一樹梅花一尊酒
知君東望亦凄然

宋周臣生子二首

試手君家助喜詩秋風丹桂長新枝昂霄聳壑他年見

木月同宮記此時

木月同宮五星家謂人以此時生者長必貴

玉季金昆世共賢天將文筆付家傳清新未要梅花賦

射虎留看第二篇

鄉先生宋濟川以射虎詩著名

雛鳳來時鶴卵成雨兒前後不多爭阿寧解語應須道
猶是渠家百日兄

乞酒示皇甫季貞

醉頭慵舉睡昏昏夢裏青旗雪擁門枕上一杯風味好

糟床何處得茶渾

李白騎驢圖

八表神游下筆難
畫師曾次自酸寒
風流五鳳樓前客
枉作襄陽雪裏看

許由擲瓢圖

不知黃屋不知堯
喧寂何心計一瓢
我是許由初不爾
只將盛酒杖頭挑

九月晦

松楸千里動悲哀
說道迴家早晚迴
九月忽驚今日盡
蒲城風散紙錢灰

雜著

燒殘芻狗不能神
一色貂裘繡帽新
好箇路傍官堠子
經年端坐看行人

送窮

送君君去欲何之
暫去還來也不辭
但媿苦無相贈物
柳車輕似去年時

即事

四長東州貢姓名阿茶能誦木蘭行元家近日添新喜

掌上寧兒玉刻成

寧兒叔開小字阿茶第四女字叔開

侯相公所藏雲溪圖曾命賦詩三首但記其一

云祖道東門未有涯田君方駕入宮車祇應

千古狼溪路人說山中宰相家相公以體重

不任步趨詔許駕小車至朝殿外門故予詩

及之北渡後往東平路經雲溪因為之賦

黃山圖子翰林詩千里東州有所思前日相公門下客
國亡家破獨來時

陳德元竹石二首

一片春雲雨未乾兩枝新綠倚高寒瘦龍不見金書字
試就宣和石譜看

萬石綱舡出太湖九州膏血一時枯阿誰種下中原禍
猶自昂藏入畫圖

同漕司諸人賦紅梨花二首

梨花曾比太真妃
別有風流一段奇
白雪為肌玉為骨
淡粧濃抹總相宜

瓊枝玉蘂靜年芳
知是何人與點粧
可道海棠羞欲死
能紅能白更能香

吳子賢樗菴二首

人道樗形百醜全
我知道造物向君偏
世間正有明堂柱
偃蹇風霜得幾年

廣莫初無匠石過
一丘一壑柰君何
世間正有明堂柱

春草輸羸校幾多

太乙蓮舟圖三首為濟源奉先老師賦

老師吾宗盟

泠泠風外到仙臞琢玉羊欣定不如六合空明一蓮葉

更須遮眼要文書

仙人在蓮葉臥看書

仙人寧得此婆婆亡柰丹青狡猾何我與太虛同一體也無蓮葉也無波

太一青藜出漢年明窓開卷一欣然憑君莫問題詩客不是韓駒第二篇

遊天壇雜詩十三首

芳樹陰陰鳥語譁
綠雲晴雪映紅霞
青山可是堪人恨
藏着中巖十里花

漫山白白與紅紅
小樹低叢看不供
總道植花香氣好

就中偏愛玉瓏鬆

花名有玉瓏鬆

只願長城沒徹頭
豈知蒸土更堪憂
秦人若見千年後

抱杵臨洮老死休

避秦溝

溪童相對采椿芽
指似陽坡說種瓜
想是近山營馬少

青林深處有人家

僊貓聲在洞中聞，憑仗兒童一問君。
同向燕家舐丹鼎。

不隨雞犬上青雲

仙貓洞是日兒子叔儀呼貓應者
土人傳燕家雞犬升天貓獨不去

諸峯羅列擁朝臺，落日行雲一望開。
絕似太山山上看，分明齊嶺是徂徠。

空翠霏煙海浪深，鼇頭鵬背半浮沉。
不知脚底山多少，還盡平生未足心。

湍聲洶洶落懸崖，見說蛟龍擘石開。
安得天瓢一翻倒。

躡雲平下看風雷

時旱甚
故云

僊壇倒影鳳麟洲一道雲光插素秋也是天公開不得

海東移着海西頭

道民終不忘天台姓字依然在蜜崖為問松臺千歲鶴

白雲何處不歸來

近歲盧氏蜜崖人迹不及處有題字
云道民天台司馬承禎過松臺即白

雲老
墓地

僊人龍躡玉為鞭石穴留書世不傳弱水蓬萊三萬里

青山今古幾何年

近年人有得司馬先生石穴
所藏丹經予獲觀於山陽

風期身後復身前一讀丹華似有緣八表神遊吾豈敢
或能搖筆賦垂天

擬着茅齋北斗平殘年細讀洗心經詩成應被盧仝笑

曾見青山養伯齡

盧仝送伯齡出山云伯齡不厭山山不養伯齡予以早當出山故自戲云

北斗平在天壇之後

初發潞州

潞州住久似并州身去心留不自由白塔亭亭三十里

漳河東畔幾迴頭

雜詩六首

鼠肝蟲臂復何辭
坎止流行亦有時
已被吳中喚僮父
却來河朔作炎兒

隆州兵騎往來衝
客路仄郊更向東
大似天教浣塵土
數程都在水聲中

懸崖飛瀑駭初經
白玉雙龍擊迅雷
却恨暑天行過速
不曾赤脚踏清冷

黃華北下馬陵南
佛屋燒殘有石龕
想是故鄉行欲近

粥糜渾覺水泉甘

莊休通蔽互相妨鄉社情親豈易忘
司命果能還舊觀

髑髏端合羨侯王

鄉關白日照青天徒步歸來亦可憐
袖裏新詩一千首
不愁錦繡裹山川

遺山集卷十二